

**ეთიკის კომისიის  
გ ა დ ა წ ყ ვ ე ტ ი ლ ე ბ ა  
დისციპლინური წარმოების შეწყვეტის თაობაზე**

**მესამე დისციპლინური კოლეგიის შემადგენლობა:**

ქეთევან უტიაშვილი – კოლეგიის თავმჯდომარე

თეიმურაზ თოდრია – კოლეგიის წევრი

ხათუნა ჩხაიძე – კოლეგიის წევრი

**საჩივრის ავტორი – ბ. დ.**

**საჩივრის კომისიაში შემოსვლის თარიღი: 04.06.2018**

**საჩივრის რეგისტრაციის ნომერი: 075/18**

**საჩივარი შემოტანილია: ადვოკატ ა. კ.-ის მიმართ /სიითი №/**

**საჩივრის მოთხოვნა:** ადვოკატ ა. კ.-ისთვის „ადვოკატთა დისციპლინური პასუხისმგებლობისა და დისციპლინური წარმოების შესახებ“ დებულებით გათვალისწინებული პასუხისმგებლობის დაკისრება

**I აღწერილობითი ნაწილი**

**1. საჩივრის ავტორის პოზიცია:**

- 1.1 2018 წლის 04 ივნისს საქართველოს ადვოკატთა ასოციაციის ეთიკის კომისიას საჩივრით მომართა ბ. დ.-მ და მოითხოვა ადვოკატ ა. კ.-ისთვის დისციპლინური პასუხისმგებლობის დაკისრება.
- 1.2 საჩივრის ავტორის განცხადებით, 2015 წელს, უძრავი ქონების გაფორმებასთან დაკავშირებული პრობლემების გამო დაუკავშირდა ადვოკატ, ა. კ.-ს. ბ. დ.-მ ადვოკატს ჰონორარის სახით გადასცა 800 აშშ დოლარი, თუმცა აღნიშნული დავა სასამართლოში აღარ გაგრძელდა, ვინაიდან

ბ. დ.-მ ქონება თავის სახელზე გაიფორმა. საჩივრის ავტორის განცხადებით, ადვოკატს მისთვის გადაცემული თანხა არ დაუბრუნა.

- 1.3 საჩივრის ავტორი ასევე განმარტავს, რომ 2016 წელს, საქართველოს მთავარ პროკურატურაში დაიწყო გამოძიება მის საკუთრებაში არსებულ 20 ჰა მიწასთან დაკავშირებით, რისთვისაც კვალავ დაუკავშირდა ადვოკატ ა. კ.-ს. ადვოკატმა განუმარტა, რომ გამოძიების ორგანოდან საქმე გადაეცემოდა სასამართლოს, რისთვისაც დასჭირდებოდა ადვოკატი. ა. კ.-მ საადვოკატო მომსახურებისთვის მოითხოვა 3 000 (სამი ათასი) ლარი. საჩივრის ავტორმა 1800 ლარი ჩაურიცხა საბანკო ანგარიშზე, ხოლო 1200 ლარი გადასცა ხელზე ადვოკატის ოფისში: ა.-ის ქ. NX-ში. თანხის გადაცემის შემდეგ ადვოკატს არანაირი მოქმედებები არ განუხორციელებია, არ გაუფორმა მინდობილობა და არ დაიცვა საჩივრის ავტორის ინტერესები სასამართლოში. ბ. დ. ასევე უთითებს, რომ საქმეზე მიმდინარე გამოძიება ჯერ არ დამთავრებულა.
- 1.4 საჩივრის ავტორის განცხადებით, მან მიმართა ადვოკატს თანხის დაბრუნების მოთხოვნით, თუმცა ა. კ.-მ არ დაუბრუნა თანხა. ამასთან, ადვოკატი არ პასუხობს სატელეფონო ზარებს.
- 1.5 საჩივრის ავტორი ითხოვს ადვოკატ, ა. კ.-ისთვის დისციპლინური პასუხისმგებლობის დაკისრებას და მისთვის გადახდილი ჰონორარის დაბრუნებას.

## **2. ადვოკატის პოზიცია:**

- 2.1 2018 წლის 16 ივლისს გამართულ საპროცესო კოლეგიის სხდომაზე ადვოკატმა განმარტა, რომ ბ. დ.-ს სამართლებრივ დახმარებას უწევდა უძრავ ქონებასთან დაკავშირებით და ასევე სისხლის სამართლის საქმეზე მიმდინარე გამოძიებაზე, რისთვისაც არაერთხელ შეხვდა სისხლის სამართლის საქმის მწარმოებელ პროკურორ-გამომძიებელს, ჯემალ ლომსაძეს და ასევე მასთან ჰქონდა ხშირი სატელეფონო კომუნიკაცია.
- 2.2 ადვოკატმა აღნიშნა, რომ ბ. დ.-ის ინტერესები დაიცვა სათანადო დონეზე. ა. კ. ადასტურებს ბ. დ.-ის მიერ მისთვის 1800 ლარის გადაცემის ფაქტს.

## **II სამოტივაციო ნაწილი**

### **2. ფორმალური წინაპირობების შემოწმება:**

- 3.1 ადვოკატი ა. კ. არის ს.ს.ი.პ. საქართველოს ადვოკატთა ასოციაციის წევრი /სიითი № /, სპეციალიზაცია - სისხლის სამართალი. ადვოკატის ს.ს.ი.პ. საქართველოს ადვოკატთა ასოციაციის წევრობა არ არის შეჩერებული, ასევე ადვოკატი არ არის გარიცხული ს.ს.ი.პ. საქართველოს ადვოკატთა ასოციაციიდან.
- 3.2 ბ. დ.-მ ეთიკის კომისიას საჩივრით მიმართა 2018 წლის 04 ივნისს.
- 3.3 სადავო ქმედება განხორციელდა 2015-2016 წლებში. „ადვოკატთა შესახებ“ საქართველოს კანონის 32-ე მუხლის მე-2 პუნქტის საფუძველზე არ არის გასული დისციპლინური დევნის აღძვრისთვის დადგენილი ხანდაზმულობის ვადა – 5 წელი.

### **3. შემაჯამებელი დასკვნა:**

საპროცესო კოლეგიას მიაჩნია, რომ ადვოკატ ა. კ.-ის მიმართ „ადვოკატთა დისციპლინური პასუხისმგებლობისა და დისციპლინური წარმოების შესახებ“ დებულების 22-ე მუხლის პირველი პუნქტის „ბ“ ქვეპუნქტის თანახმად, უნდა შეწყდეს დისციპლინური წარმოება.

#### 4. სამართლებრივი შეფასება:

- 4.1 ბ. დ.-მ 2018 წლის 20 სექტემბერს ეთიკის კომისიას მომართა განცხადებით, რომლის მიხედვით ადვოკატი ა. კ. დაჰპირდა მას თანხის დაბრუნებას და შესაბამისად სურს ა. კ.-ის მიმართ დაწყებული დისციპლინური საქმის წარმოება შეწყდეს.
- 4.2 „ადვოკატთა დისციპლინური პასუხისმგებლობისა და დისციპლინური წარმოების შესახებ“ დებულების 22-ე მუხლის პირველი პუნქტის „ბ“ ქვეპუნქტის თანახმად: „საპროცესო კოლეგია შეწყვეტს საქმის წარმოებას დებულებით გათვალისწინებული საფუძვლებით, ასევე იმ შემთხვევაშიც, თუ საჩივრის ავტორი, უარს იტყვის საჩივარზე (მიმართვაზე)“. შესაბამისად, ვინაიდან საჩივრის ავტორმა უარი თქვა საჩივარზე, ადვოკატ ა. კ.-ის მიმართ უნდა შეწყდეს დისციპლინური საქმის წარმოება.

საპროცესო კოლეგიამ იხელმძღვანელა „ადვოკატთა დისციპლინური პასუხისმგებლობისა და დისციპლინური წარმოების შესახებ“ დებულების 22-ე მუხლის პირველი პუნქტის „ბ“ ქვეპუნქტით; 31-ე მუხლით, მე-40 მუხლის პირველი პუნქტით და გადაწყვიტა:

### III სარეზოლუციო ნაწილი

1. დისციპლინურ საქმეზე N075/18 ადვოკატ ა. კ.-ის მიმართ /სიითი № / შეწყდეს დისციპლინური წარმოება.
2. გადაწყვეტილების ასლი გაეგზავნოს მხარეებს.
3. საპროცესო კოლეგიის გადაწყვეტილება არ საჩივრდება.

კოლეგიის თავმჯდომარე:

/ქეთევან უტიაშვილი/

კოლეგიის წევრი:

/თეიმურაზ თოდრია/

კოლეგიის წევრი:

/ხათუნა ჩხაიძე/